

Parosifa fain Yems-ke siisimok

Miimow opora

Yems Yeesus wiamun akena-ke. O wi Kristen teeria eena Yerusalem-pa ikemik nain woos mua wiar ikua.

Yems parosifa siisimok fain wi Kristen teeria Mua Maneka opora baliwep wiar ookuk naep suule wiek. Wi wia asipami kema baliwep aawuk naep opor unowa siisimok nain arekin oporiw siisimok.

Aria opora fain kekanowa maek, mua Yeesus opora wiar opap ookiya nain oram oporiw me ookinok, weetak, wi emerla mua sira eliwa wia oninok. Naeya wi urufap maikuan, mua nain Yeesus opora kekanowa opiya, naap maikuan.

1 ¹Yo Yems eena Mua Maneka ne Yeesus Kraiis uuwow mua-ke parosifa fain ni Yuuda Yeesus opora wiar opiman nain nia siisimomiyem. Ni eena owow epasia akena-pa ikeman nain. Ne maiyem, ni kema sonom eliwa ikeka nia naiyem.

Akimowa-pa kekanep ikowa

²⁻³Aria emar unowik, ni pina sira kamenap niar imenarowa imenarion. Niar imenareya-na kemelowiw ikeka. Ni Yeesus sira ookam-ikaiwkin sira-sira nia onikuan. Ne neeke ni kekanep ikowa nain paayarowen. ⁴Naapeya ni kekanep ikowen-na, ni opora marew ne eliw nomakowen. Nomakep-na kema pukep Yeesus ookowa nain maa iiwawun paayarowen.

Mua Maneka nokariwkin kema suuwowa eliwa yiinok

⁵Ni mua kema baliwep wuepowa nain me pepekeya-na, Mua Maneka farep nokareka. O eliw nia asipinon. O mua maa nokariwkin wia amukarowa marew oram ifaniw wuam-ikok wia apekariya nain-ke.

⁶Nain ni Mua Maneka maa nokaru naep-na, kema kuisow wuap ikok nokareka. Ni kema ere-erup arem-ikok nokarowen-na ni kema ifer umukut eena ewar-ke fuureya kuiya nain saarik. ⁷⁻⁸Mua kema ere-erup

nain maken marew, naapeya no kema naap ikok maa mauwa kookalep nokarin nain ikoka Mua Maneka efa apekarinon, naap me nae, weetak.

Wi mua maa marew ne wi mua unumiya

⁹Aria ni Yeesus teeria, ni unum marew akena nain Mua Maneka-ke unuma nia purupok, nain kemeleka. ¹⁰Neemi ni mua unum onaiya ikeman nain, Mua Maneka nia poraiya nain, nis pun kema eliw iw ikeka. Moram, ni mua unum onaiya ikeman nain sipir wowosa saarik epa maala me ekowa naap ikok ewur mesenalowen. ¹¹Ni sipira kema suuweka, feenap, uuriw akena ama kekanowa onaiya urupemi sipira unowa kuumeya wowosa eliwa nain ururiya, ne urufowa eliw marew. Ne sira naapiw, ni mua unum onaiya ikeman nain ikoka niena uuwowa nain kemaiw ikaiwkin maa unowa nain niar samorarinon, sipir wowosa nain saarik.

Akimowa sira-sira wiar imenarinon

¹²Aria wi mua eena iiriw akimowa sira-sira wiar imenareya akimowa nain nomakemik nain, wi kemeluk. Moram, akimowa sira naap nain pepe nan nomakemik. Wi mua nain ikoka Mua Maneka-ke wia kiripomaya owow iinan-pa anane eliwa ikaikuan. Mua Maneka-ke unum maneka wiemi bala eliwa ikiwosa-pa wia orowawominon. Iiriw wi mua o kookalimik nain wia kiripomowa maep koonowak nain wiarik. ¹³Aria no akimowa sira naap nain niar imenareya oro-boonep-na, feenap me mae, “Akimowa fain Mua Maneka-ke efa akimak.” Naap me mae, weetak. Moram, Mua Maneka sira samora onowa kema-ko me wiar ikua, ne ona pun mua sira samora akimowa-pa-ko me wia wuiya, weetak. ¹⁴Nain wiena mua kui-kuisow akimowa-pa oro-boonimik nain wiena mokok afile-pa ne wiena mia kookalowa-pa kokor erap wakimik. ¹⁵Sira nain feenap, wiena mia kookalowa samora nain onowa kemaiw ikok sira samora imenikuan. Ne sira samora nain-ke wiena umep Mua Maneka wiar ikiwowa era wiar puukiya.

¹⁶Naapeya emar unowik, niena me niam peeskimeka. ¹⁷Maa eliw akena nain Mua Maneka-ke owow iinan-pa ore wuap yia sesekomiya. Yiena Auwa Mua Maneka eena mokoma, siiwa ne ama onomakek nain-ke. O me fain saarik, maa ipisia ama parina epa puukap-puami epa wueya ama parina oraiya, naap wame puukowiya, weetak. O anane parin manekiw ikaiya, sira kiri-kiripowa nain weetak. ¹⁸Ne wi opor makena efar opap muuka wiipa efar aruk naep naap onak. Ne naapeya ona miiwa fain maa unowa onomakek nain maa eremina o patirimik maa nain saarik wiar ikemik.

Mua Maneka opora miimap ookowa-ke

¹⁹Aria emar unowik, ni fain kemaiw ikeka. Ni mua unowiya opora wiar miimowa-ke ifana wuap baliwep wiar miimeka, aakunowa-ke kema

suuwap aakuneka, ne ewur me kema bagiwireka. ²⁰Nain moram, Mua Maneka baliwep ikowa yia maakek nain bagiawiw ikainon-na kakeniw ikowa me ikaiyen. ²¹Naapeya ni uruw mia samora sira niar ikomakek nain piipueka, ne sira samora onam-ikaiman nain pun piipuami kekelka ikok Mua Maneka opora wiar opaka. Opora eena kema-pa nia wuomak nain-ke kukusa eliw nia kakenominon.

²²Feenap me maeka, Mua Maneka opora miimapiw wuiyen, ni kema naap me wueka, niena me niam peeskimeka, weetak. Opora wiar miimami ookam-ikeka. ²³⁻²⁴Wi mua opora miimapiw me ookimik nain sira fain saarik, mua ona miira galas-pa balisow akena wame urufap eenan ekami ewur akena ona miira wame kema irinariya. ²⁵Wi mua Mua Maneka sira eliw akena eena pina yiar iiraromowa nain urufap ookimik nain eliya ikaikuan. Sira nain balisow akena wiar amisarep ikok kema irinarow marew ookimik nain, Mua Maneka-ke maa kamenap onimik nain wiar kemelami wia saliwinon.

²⁶No mua feenap main nain, “Yo anane Mua Maneka opora wiar ookiyem,” naap main, nain no kema wuepow marew aakunin. Opora momor aakunin nain nena name peeskimin. No Mua Maneka opora ookiyem naen nain oram maen. ²⁷Ne sira eena yiena Auwa Mua Maneka eliw akena naek nain feenap: wi apura, ne muuk maata maa marewa nain wia karuemi wia asipam-ikowa, ne miiw sira samora onimik nain me wiokowa, sira nain.

Mua sira epaskun wia wuowa

2 ¹Aria emar unowik, ni yiena Maneka Yeesus Krai opor kekanowa wiar opap-na mua unowa epaskun wia wueka. Yeesus Krai eena umep ona parin onaiya iikirak nain. ²Ni iir oko-pa lotu onowa naep niam fiirimep ikaiwkin mua erup niar kererikuan. Mua oko wapen maa bala eliya wuap ne mia suuwowa eliya suuwap kererinin, ne mua oko mia suuwowa awona pere-perenowa nain suuwap kererinin. ³Ne ni mua mia suuwowa eliya ikua nain wiar urufap kemelami ane-puukami maakowen, “Aa sira eliya, epap pokow epa eliya-pa feek poka.” Ne mua oko, maa marewa nain poromi maakowen, “No ekap eenek iimare,” e maakowen, “No miiwa-pa neek poka,” naap maakowen. ⁴Ni mua oko wia kookaliman ne oko weetak. Ni sira oniman niena ikiwos samora nain ookami naap oniman, ae-na.

⁵Naeya emar unowik, ni kema suuweka, Mua Maneka-ke yena teeria-pa efar ikemik wi nain kakeniw ikok Yeesus Krai opora kekanowa wiar opuk naek. O ona iiriw opora feenap maep koonowak, “Wi mua yo efa kookalimik nain yena pika kemena-pa efar ikaikuan,” naap maek. Naap maep wi mua unum marew nain yena kemena-pa efar ikauk naep ona iiriw wia nanikap-puak. ⁶Ne nis-ke wi mua unum marew nain wia

poromi emina wia uruwaman. Ne wi maamuma mua wia kookaliman. Nain wis-ke nia samorimik, ne medistret mokoka-pa opora-pa nia wuimik. Wi naap me nia onimik naiman-i? ⁷Ne wi Yeesus Krai unum maneka eena ni ookam-ikaiman nain firekimik nain-ke, ni nain me wiar kema suuwiman-i?

⁸Sira maneka Mua Maneka opora-pa ikua nain feenap maek: “No mua oko wia kookale, nena name kookalin naap.” Sira maneka nain balisow ookap-na ni sira eliwa onaman nia nainen. ⁹Nain ni wi mua unum onaiya ikemik nain wia kookalemi wi mua unum marew nain wia porowenna wia kookalowa sira nain puukowen. Ne Moses sira wuomakek nain ookami nia maikuan, ni sira puukaman. ¹⁰Moram o mua Moses sira wuomakek nain ookam-ikok sira kuisow muuta puukinon-na, aria Mua Maneka-ke mainon, sira unowa nain iiwawun puukak nainon. ¹¹Moram, ona sira yiek nain feenap maek, “Ni mua oko emerla me wiar mufeka,” neemi “mua oko me wia ifakimeka.” Nain no mua oko emerla me wiar mufon, ne no mua wia ifakimon. Nain no sira puukan nefa mainon.

¹²Aria naapeya niena soomarowa ne aakunowa pun Mua Maneka sira yiek nain kakeniw ookap soomareka. I sira kamenap onimik nain mokakiya yiar ookap yia kiripominon. Naapeya i Moses sira wuomakek nain baliwep ookiyen-na pina marew eliwa ikaiyen. ¹³Moram, ikoka Mua Maneka yia mekawow epa nain epeya, no mua oko me wia kemalep asipan nain ikoka os pun kirep me nefa kemalinon. Naapeya yo feenap mainen, no mua wia kemalinan-na no sira samora onomaken nain Mua Maneka me nefa kiripominon.

Yeesus opora wiar opap sira ookowa nain

¹⁴Aria naapeya emar unowik, ni feenap maowen-na, “Yo Yeesus Krai opora wiar opiyem.” Opora oram maneka maiman nain ni sira-ke, yo mua naap nain-ke me niam urufiman. Ni sira naap nain Yeesus nia aawinon-i? Weetak. ¹⁵⁻¹⁶Aria sira oko feenap. Niena Yeesus teeria epaskun mua e emerla oko mia suuwowa ne maa enowa iiwariya nain no maa kuisow-ko iwow marew feenap maakinan, “No ikiwemi bala balisow name opap maa enep kema sonom eliwiw ike.” Nain o asipowa maa-ko me iwon. No opora muutiw maaken nain, eliw asipinon-i? Weetak. ¹⁷Naapeya no Yeesus Krai opora wiar opiyem naap name naen, nain no mua wia asipowa sira nain me ookinan-na no opora naap name maen nain maken marewa ikainon.

¹⁸Aria mua oko-ke feenap mainan-na, “No Yeesus Krai opora wiar opiyem maen. Nain yo wia kookalowa sira eliwa oniyem,” naap mainan. Nain, aria yo opora feenap kiripominen, no sira eliwa onowa marew, oram maneka Yeesus Krai opora wiar opiyem main nain kamenap makena nefar urufinen. Ne yo Yeesus Krai opora wiar opami wia

asipowa sira onamkun efar urufap makena efa nainan. ¹⁹No feenap main, Mua Maneka ona waisow. Naap main nain eliwa. Wi sawur samora pun Mua Maneka ona waisow naep mia fufuep karanimik. Naapeya nos pun Mua Maneka kema suuwap baliwep ike.

²⁰Ni momor ika-ke, yo balisow-ko nia maakemkun amisareka. Yeesus Kraiss opora wiar opimik nain me akimowa, oram maimik nain maken marew. ²¹Fain kema suuweka. Iriw ekera yiena nomokow fiira Abraham Mua Maneka-ke maakeya opora osiw ookap, o patrirowa naep ona muuka Aisak esimsa-pa inawap-puap ifakimekam naep onak. Naapeya Mua Maneka sira naap urufap o mua kaken eliwa-ke naek. ²²Ni nain kema suuwiman-i? Abraham Mua Maneka opora wiar opak, ne opora maakek naap kakeniw ookak. Sira onak nan Mua Maneka opora wiar opak nain maken akena wiar urufamik. ²³Ne opora fain iiriw Mua Maneka opora-pa siisimep-puamik nain iiwawun pepekerak. Feenap,

“Abraham Mua Maneka opora wiar opak, naapeya Mua Maneka-ke o mua kaken eliwa-ke naek.” (Yenesis 15.6)

Ne pun yena emar-ke naek. ²⁴Naapeya is pun kema feenap suuwikua, Yeesus Kraiss opora wiar opimik nain oram maowiw maem-ikaiyen-na Mua Maneka ni mua kaken eliwa-ke me yia nainon, weetak. I Yeesus Kraiss opora wiar opam-ikok sira eliwa onamkun mua kaken eliwa-ke yia nainon.

²⁵Aria iiriw ekera pina emeria oko unuma Reap, o sira onak nain kema suuwiman-i? Wi Isrel mua-ke owowa ikum wia urufu naep owowa wiar urupemik. Ne owow mua papako-ke wia opu naep akupiwkin os-ke wia aawep ona koorapa wia pipilimep-puak, ne naap ikok wia sesekeya era oko aawep ikiwemik. Sira naap oneya Mua Maneka-ke o emeria kaken eliwa-ke naek. ²⁶Nain ni feenap kema suuweka, i ewar mia-pa yiar ikua nain yia piipuonon-na mia uminon. Ne sira naapiw, Yeesus opora wiar opowa pun naap, oram maowiw maemi sira eliwa onowa marew ikaiyen-na, opora opimik naimik nain pun maken marew.

Aakunow sira

3 ¹Aria naapeya emar unowik, ni mua unow akena somek mua me areka. Ni amisareman, Mua Maneka mua unowiya uuwowa mokakiya ookap yiar mekawinon. Nain i mua somek mua ikemik fain uuwowa nain balisow akena yiar pupep mokakiya ookap yiar mekawinon. ²Moram i sira unowa-pa wakimik. Mua eena opora aakunemi iir kuisow-ko me samoriya nain, o mua kakeniw akena-ke. Naeya ona pokowa ne soomarowa baliwep akena wame urufinon.

³Ni oos wia urufeka, i oos yiena kookalowa-pa yia pikiwinok naep aen iwa ifara-pa kaikap opaimik ona-pa wiar wuap nain mufiyen-na eliw yiena kookalowa-pa ikiwinon. ⁴Aasa pun sira naap, oramiya maa

manek akena, nain ewar maneka-ke naeya ikiwiya. Aasa sigar belemuta, ne sigar opow mua ona kookalowa-pa ikiwowa kookalep kiripeya aasa naap ikiwiya. ⁵Ne aria i mua omaiwa pun naap, oramiya maa belemuta oram, nain opora maemi wame piriya. Ne mukun munin belemuta pun naap, oramiya soor maneka, mukun munin belemuta nain-ke wilinemi soor maneka nain kuumeya awemi weeserion. ⁶Ne omaiwa-na mukuna saarik, maa samora imenowa onoma-ke. Nain-ke i mua mia-pa yiar ikok i mia ara unowa fain epia ara-pa yia wuiya. Ne soomarowa iiwawun yiar samoriya. Omaiwa-ke sira samo-samora unowa imeniya nain aakunowa samora onoma mukuna anane ikaiya nain nan imenariya.

⁷Sira naapeya maa unowa fain i yiena eliw memelien, maa asia, nepa, ifa ne ifer maa unowa pun eliw wia memelien. Maa unowa iiriw wia memelamik. ⁸Nain mua kuisow omaiwa-ko me memelimik. Moram, maa eliw marewa, ne maa samoriw imeniya. Neeke mudi samora unowa wiar ikua. ⁹Aria omaiwa nainiw i yiena Auwa Mua Maneka unuma purupimik. Ne pun sarinemi mua oko opor samora wiimik, i mua eena Mua Maneka ona saarik yia onak nain. ¹⁰Omaiwa kuisow nan Mua Maneka unuma purupimik ne mua wia amukarimik. Ni sira naap me oneka, weetak akena.

¹¹Omaiwa kiri-kiriya nain feenap kema suuweka, eka arona kuisow nan-pariw eka masia ne eka eliwa oraiya-i e wia? ¹²Ne nomokowa fik-ke makenaremi oliw makena wuinon-i e wia? Ne nomokowa wain-ke makenaremi fik makena wuinon-i e wia? Weetak. Sira naapiw eka ona kuisow neekeriw eka masia nain-ke wame kiripami eka eliwa me arinon, weetak akena.

Amis eliwa Mua Maneka-ke yiinon

¹³Ne ni teeria mua kema pukowa ne ikiwos eliwa-ko ikua-i? Mua nain ona kema pukowa ookami wame poromi sira eliwa oninok. Ne ona balisow ikainok. Naap onami o sira eliwa nain ariman wame wuinok. ¹⁴Ne ni mua yo kuisow naiman nain, ne ni yosiw yookuk naep kaka niam fookiman nain ni unuma me niam purupeka, ne Mua Maneka opor makena nain me makena-ke me naeka. ¹⁵Kema suuwowa sira naap nain me Mua Maneka-ke kema yiek, weetak. Kema suuwowa naap nain wi miw fain mua kema-ke, miw sira-ke ne Satan sira-ke. ¹⁶Moram yo kuisow naemi kaka niam fookowa sira nain-ke niar imenareya ni kema kuisow me aremi niam fo-fookami sira samora unowa imenowen. ¹⁷Ne kema suuwowa eena Mua Maneka yiek nain tumin muup marew ona kakeniw eliwa naap ikaiya. Nain feenap: kema kuisow epaskun wuowa, kekelka ikowa, opora miimowa ne wia kemalowa kemaiw ikok mua oko wia asipam-ikowa, ne mua wia mekawowa marew, wia wadolalowa sira marew, sira unowa naap nain. ¹⁸Ne wi mua kema kuisow-pa ikau naep

anane wia fiirimimik nain-ke wi pokow eliwa wia ofakowiwkin wis pun sira eliwa-pa eliw pokikuan.

Sira samo-samora piipuap sira eliwa ookowa

4 ¹Ne ni opor onoma kamenap nain kema niam bagiwirami ni-nieniw irakiman? Ni irakiman nain miiwa fain maa kookalowa kema-pa anane niar imenareya ni-nieniw irakiman. ²Ne ni maa kookaliman nain me aawiman, naapeya ni mua wia ifakimiman, ne maa wiar kema kuowa niar ikua. Ne ni nain kema manekiw ikok maa nain aawowa me pepekeya ni-nieniw niam aakunowami irakowa fakeriman. Moram ni maa kookaliman nain Mua Maneka farep me nokariman. ³Ne ni niena maa kookalep nokariman nain niena miiwa-pa feeke mia kookalowa-pa ikowa naep nokariman. Naapeya Mua Maneka me nia apekariya.

⁴Ni Mua Maneka ookowa nain mia suuwowa saarik wuiman. Ni miiw fain sira manek akena kookaliman nain, Mua Maneka ona iiwua mua niam arowiman. Ni fain me amisareman-i? Makena, wi mua miiw sira womar wiar ikau naep onimik nain wiena akena Mua Maneka iiwua mua wiam arowimik. ⁵Mua Maneka opora feenap maep-puak nain, feenap, “Mua Maneka ona Ewar Eliwa sesekeya i yiamiya ikaiya nain-ke me efa piipueka naiya.” Ni opora nain oram maek wiar naiman-i? ⁶Nain Mua Maneka ona yia asipowa naep manek akena yia kemalep yia asipiya. Naapeya ona opora-pa feenap maek,

“Mua Maneka wi mua wiena unuma wiam purupimik nain wia poraiya. Ne wi mua wiena unuma wiam poraimik nain wia kemalep wia asipiya.” *(Gutpela Sindaun 3.34)*

⁷Ne naapeya ni niam poromi Mua Maneka opora baliwep wiar ookeka, ne Satan fieneka. Naeya o nia piipuap nia baurarion. ⁸Ni Mua Maneka mamaiya-pariw ikeka. Ne os pun ni niamiya ikainon. Neemi ni eena sira samora-pa ikeman nain sira nain piipueka. Ni kema ere-erup ikaiman nain pun ni aakisa ikiwos samora piipueka. ⁹Ne ni sira samora onaman nain kema samorareka, kerew akena omomeka ne niena niam irowa sira kema suuwap omomeka. Ne niena alakuow sira pun kema suuwap kema samorareka. ¹⁰Naap onap Mua Maneka mokoka-pa niam poreka. Naeya os-ke unuma nia purupinon.

¹¹Naapeya emar unowik, ni nieniw me niam tuunami, murarow opora me niam oneka. Moram ni Yeesus teeria mua oko murarow opora wia onami wia mekawowen-na ni Moses sira wuomakek nain pun murarow opora onami mekawinon. Naeya ni sira mekawiman nain sira nain me ookiman, moram ni sira nain tuuniman. ¹²Mua Maneka-ke sira unowa wuomakek, ne sira nain ookami mua wia mekawiya. Ona waisow yia aawinon, ne pun ona waisow iiwawun yia samorinon. Ne ni mua sira kamenapeya niam tuunami niam mekawiman.

¹³Ni mua papako feenap maiman “I ikoka uurika, ere e fofa oko-pa owow oko-ko wiar ikiwiyen. Neek ikok mokoma kuisow uuwowa onami maamuma-ko imeniyen,” naap maiman. ¹⁴Ni eena naap maiman nain ni uurika epa kamenap-ko niar imenarowa nain, ni me amisarowen! Nisna aakafua saarik, urupemi, epa ekow marew puep ikiwemi mesenaliya naap. ¹⁵Naapeya ni feenap maowa-ke eliwa, “Ona Mua Maneka-ke kookalep-na, ona kookalowa-pa i eliw ikok maa fain oniyen, e maa oko-ko oniyen.” Ni naap maowa-ke eliwa. ¹⁶Nain ni niam purupemi niena kookalowa-pa onowa nain aakuniman. Sira naap nain eliw marew. ¹⁷No sira kakeniw onowa amisarep ikon nain me onowa nena akena sira samora onin.

Wi maamuma mua-ke yoowa aawikuan

5 ¹Aria ni maamuma mua nain, nefa komarka, ni pina samora nain ikoka feenap niar imenarinon, naapeya ni kema-kemaniya omem-ikeka. ²Maa unowa iiriw niar beelalep ikua, ne niena mia suuwowa eliwa nain pun puut mikap samorarep ikua. ³Ne niena maamuma maneka, gol ne siliwa maa naap nain iiriw ros opak. Ne nain-ke ni niena sira kamenap nain ariman niar wuiya, muut nain ikoka niena maamuma ne niena pun iiwawun mukuna-pa mesenalinon. Moram ni maa unowa firimem-ikaiman nain ikoka miiwa fain weeserow epa-pa ni yoowa aawowen. ⁴Ni miimaman-i? Ni iiriw wi mua manina nia nopam-ikomiwkin me wia sesenarem-ikeman nain nia sarinemik. Naeya ikoka ni Mua Maneka ekapow epa neeke opora-pa nia wuikuan. Ne wi mua manina nia iwam-ikomamik nain me wia sesenarem-ikeman. Naeya wi omowa-ke ikiwep Mua Maneka iinan akena nain ifana wiar oreya miimak. ⁵Ne ni miiwa-pa fan mia kookalowa sira-sira ookami bala eliwa opami enowa eliwa enemi niena niam kema suuwowa muutiw oniman nan mia gawerariman. Ni ikoka fofa samora imenareya fofa nain ni samat arowen. ⁶Moram nis-ke wi mua opora marewa nain oram maneka wia opami opora-pa wia wuami wia ifakimeman. Ne wi-ko wapena me nia kiripomamik, weetak.

Kekelka ikowa sira

⁷Emar unowik, wi mua nain wia kema suuwap sirirowa niemik nain kekelka muuta ikeka. Naap ikaiwkin Mua Maneka kiiriw nainiw ekapow fofa nain imenarinok. Wi manin uuwow mua wia urufeka. Wi maa upep-puap kekelka muuta arewam-ikaimik. Nuupurum maneka ne muuta imenareya maa baliwep yiar eliwareya enowa maneka aawu naep naap arewap ikaimik. ⁸Mua Maneka ekapowa nain epa mamaiya arek. Naapeya nis pun kekelka muuta kekanep ikeka.

⁹Ne ni-nieniw me niam omareka, ne ikoka Mua Maneka-ke me nia mekawinon. O wia mekawowa nain ekapowa mamaiya akena arek.

¹⁰Naapeya emar unowik, nis-ke wi profet iiriw Mua Maneka unuma-pa opora wia maakem-ikemik nain sira wiar aaweke. Wi mua sira eliwa-ke, wi sirirowa aawem-ikemik nain kekelka muuta ikemik. ¹¹I amisarep maimik, wi mua sira naap nain kekanep ikaiwkin Mua Maneka-ke kema eliwa wiinon. Ni iiriw Yop sirirowa maneka aawep kekelka muuta ikua^a nain miimaman, ne Mua Maneka aakisa fan kema eliwa iwok, nain pun amisareman. Moram Mua Maneka yia kemalowa, ne yia saliwowa kema manek akena ikaiya.

¹²Aria emar unowik, maa fain-ke maa maneka, ne ni baliwep akena kema suuweke. Ni opor makena maemi makena-ke efa nauk naep owow iinan e miiwa fain unufami me maeka, e maa oko unufami pun me maeka. Nain, maa makeniya-na, ae naeka, ne weetakeya-na, weetak naeka, naap maep-pueka. Naeya ikoka Mua Maneka opora-pa me arowen.

Mua Maneka farowa sira

¹³Aria, ni teeria mua oko sirirowa aawep-na, Mua Maneka farinok. Ne mua oko kema eliwiw ikok-na, os pun Mua Maneka faremi unuma somekiw purupinok. ¹⁴O mua oko-ke napumarep-na ni Yeesus teeria woos mua wia fareya wis-ke ekapep Mua Maneka faremi o unuma unufami wel aawep woosa-pa wiar ifuk. ¹⁵Ne ni Mua Maneka farowa nain kema kuisow ikok o maa nokarowen-na mua nain napuma eliw wiar iirareya sariarionon. Ne pina wiar ikainok-na eliw wiar iirarinon. ¹⁶Naapeya niena pina nain Yeesus teeria mokoka-pa wasirkami niam asipami Mua Maneka niam faromaka. Ne ni eliw sariarowen. Moram wi mua eena Mua Maneka wi mua kakeniw-ke wia naiya nain muutiw o maa nokarimik nain wia apekariya. ¹⁷Nain ni Elaiya kema suuweke, o i saarik naap nain-ke. Nain o iiriw Mua Maneka ipia me orainok naep farep nokarek. Naeya makena, mokoma arow enakiwa naap ipia me orok. ¹⁸Ne kiiriw naapiw nokareya ipia orok. Ne miiwa maa makenaromakek.

Yeesus teeria wiam saliwowa sira

¹⁹Emar unowik, ni feenap amisareka, mua oko Mua Maneka era-pa wiar ookam-ikok piipueya-na mua oko-ke o maakemi kakeninok. Sira nain eliwa-ke. ²⁰O ikoka epa mukuna anane ikaiya neeke me ekinok naep kakenak. Sira eliwa onak muuta nain pina unowa oniya nain Mua Maneka-ke iirarominon.

^a **5.11** Iiriw ekeru Yop Mua Maneka opora wiar opak. Satan o akimekam naep Mua Maneka nokareya ae naakeya pina iwok. Naeya Yop muuka wiipa wiar umemik ne maa eneka pun, ne ona pun ikemika mane-maneka aawok. Nain o Mua Maneka me piipuak. Aakisa fan Mua Maneka-ke saliwewa napuma sariarek, ne muuka wiipa papako aawok. Nanar nain Olpela Testamen Yop-pa eliw urufinan.